

Nzambi udi usamba bantu bapuekela.

(2 Kolinto 7:6)

Mutshima wanyi, wewe udi muitshikile bua tshinyi? Udi ulubakana munda muanyi bua tshinyi? Wikale ne ditekemena diebe mu Nzambi; bualu bua nemmutumbishe kabidi bualu bua Yeye udi lupandu luanyi ne Nzambi wanyi.

(Musambu 42:11)

Nusanke mu Mukelenge

Nengambe tshiakabidi ne, Nusanke ... Mukelenge udi pa buipi. Lekelayi kuditatshisha ku bualu bumue; kadi mu malu onso ku ditendelela ne ku disengelela numanyishe Nzambi bua milombu yenu ne disakidila. Ne ditalala dia Nzambi didi ditamba dijingulula dionso dia bantu, nedilame mitshima yenu ne meji enu mu Kilisto Yesu.

(Filipoi 4:4-7)

Mukelenge udi mua kueyemenyibua, Yeye neanujadike, neanulame ku bubu. Mukelenge wa ditalala anupe ditalala misangu yonso mu mianda yonso. Mukelenge ikale ne buonso buenu.

(2 Tesalonike 3:3,16)


© C.E.R.S. - B.P. 1673 Kananga

République Démocratique Du Congo

Email: 33eme.cers.lit@gmail.com

<http://www.33eme-cers.org/>

Meyi a Busambi



Bualu bua bujitu bua bubi

Ka meme muena majia! Wansulula ku mubidi wa lufu elu, nganyi? Ndi nsakidila Nzambi bua Yesu Kilisto Mukelenge wetu! Nunku kakuena dipila mpindiewu kudi badi mu Kilisto Yesu. Bualu bua mukenji wa Nyuma wa muoyo wa mu Kilisto Yesu wakampikula ku mukenji wa bubi ne wa lufu.

(Lomo 7:24,25. 8:1,2)

Patutshivua bantu babi, Kilisto wakatufuila. Bulelela, wakututuadila makenga etu, wakutuambuila kanyinganyinga ketu; ne tuetu tuakamubala bu muntu mukumibue, mututshibue kudi Nzambi, ne mukengeshibue. Kadi bakamutapa mputa bua mibi yetu, bakamukuma bua malu mabi etu; dikenga didi divuija ditalala dietu diakadi pambidi pende, ne tuakukoleshibua ku mibundabunda yende.

(Lomo 5:8. Yeshaya 53:4,5)

Palua mapanga

Bituamba ne, Katuena ne mibi, tudi tudidinga, ne bushuwa kabuena munda muetu. Bituatonda mibi yetu, Yeye udi wa kueyemenyibua ne udi ne buakane bua kubuikidila mibi yetu, ne bua kutulengesha ku malu mabi onso. Bua bu mudi diulu kulu kule pamutu pa buloba, mbu mudi bunene bua luse luende lujalame kudi badi bamunemeka. Bu mudi luseke lua esete kule ku wesete, mbu mudiye mumushe matombokela etu kule kutudi. Bu mudi tatu ufuila bana bende luse, mbu mudi Yehowa ufuila badi bamunemeka luse. Bua Yeye udi mumanye buntu buetu, udi uvuluka ne tudi dinfuenkenya.

(1 Yone 1:8,9. Musambu 103:11-14)

Bualu bua mateta

Kakuena diteta diakunukuata didi kadiyi dikuata muntu yonso; kadi Nzambi udi mua kueyemenyibua, ngudi kayi witabuja bua nuenu nutetshibue ne diteta didi dinupita bukole; kadi palua diteta, Yeye neanuenzele njila wa kupandukila, bua nuenu numanye mua kutantamana mu diteta. Bualu bua kuteta kua ditabuja dienu, nansha ditetshibua ne kapia, didi ditamba ngolo udi ujimina mushinga mukole, nekusanganyibue ne butumbi ne dinemekibua ne buneme palua dibuluibua dia Yesu Kilisto.

(1 Kolinto 10:13.1 Petelo 1:7)

Mu dituku dia makenga anyi nakakeba Mukelenge. (Musambu 77:2)

Nzambi Mutambe Bunene wa mu diulu ... neikale tshibumba tshile kudi bantu badi bakengeshibua. Neikale tshibumba tshile kudi bantu mu tshikondo tshia ntatu. Badi bamanye dina diebe nebakueyemene; bualu bua wewe, Yehowa, kuena muanze kulekela bantu badi bakukeba ... kena upua muadi wa bapele muoyo.

(Musambu 9:2,9,10,12)

Nzambi muine wakuamba ne, Tshiena nkulekela, nansha kakese, tshiena nkushiya tshianana. Nunku, tudi tuamba ne dikima ne, Mukelenge udi mukuatshishi wanyi; tshiena ntshina; muntu neangenzele tshinyi?

(Ebelu 13:5,6)

Kabatu bapana mishamisha itanu ku makuta makeke abidi, anyi? Mushamusha umue kawena mupua muoyo ku mesu kua Nzambi. Nsuki ya ku mitu yenu mene mene idi mibala yonso. Kanutshinyi, mushinga wenu udi mutambe wa mishamisha ya bungi.

(Luka 12:6,7)

Biwikala ne dilombola bualu

Eyemena Yehowa ne mutshima webe wonso, kueyemenyi dijingulula diebe dia mianda. Umumanye Yeye bimpe mu bienzedi biebe bionso, Yeye neakululamishile njila yebe. Kuikadi muena meji ku mesu kuele wewe; utshine Yehowa, umuke ku malu mabi. Pashishe, newende mu njila webe kuyi ne ditshina, dikasa diebe kadiena dilenduka. Pawalala panshi, kuena utshina; bulelela, pawamana kulala panshi, tulu tuebe netuikale tuimpe.

(Nsumuinu 3:5-7,23,24)

Bualu bua mateyi

Muntu udi utantamana mu mateyi udi ne disanka; bualu bua pakamanabo kumujadika, neangate tshifulu tshia butumbi tshia muoyo tshiakalaya Mukelenge badi bamunanga.

(Yakobo 1:12)

Palua butekete bua mubidi

Mukelenge Yesu udi wamba ne, Ngasa wanyi udi ukukumbana, bua bukole buanyi budi bukumbajibua tshishiki mu butekete buebe.

(2 Kolinto 2:9)